

Friday, February 28, 2025

Time - 2:30pm - 2:35pm



CM

Chief Minister Pu Lalduhoma'n vawiin khan CM office tualah Indian Oil Corporation Limited te an CSR atanga an leisak 24 seaters TATA School Bus chu Ephatha Special School for the Deaf & Hard of Hearing hnenah a hlan.

Chief Minister chuan, IOCL chu kum tin Mizoram sawrkara chhiah chhunglut tam ber pawl an ni a ti a, kum khatah cheng vbch 170 chhiah an chhunglut thin tih sawiin Covid lain Dialysis khawl 21 Mizoram sawrkar an pe a ti a, Mualkhanga an Bottling Plant tih len kawnga an hmalakna ah sawrkarin ram zau tak an hawhtir a ti a, Mizoramin oil Depot tha an mamawh avangin Depot an dinna tur hmunhma pahnih an kawhhmuh mek tih sawiin hna an rawn tan thuai an beisei tih a sawi.

Bus registration senso hi Chief Minister hian a tumsak dawn a, Insurance bik erawh chu Pu Zothantluanga, TATA Dealer in a tumsak dawn a ni.



KAYAKALP AWARD

Health Minister Pi Lalrinpuii'n Mizoramah Hriselna leh thianghlimna kawnga hmalakna Kayakalp a hlawhtling thawkhat hle a ti a, damdawiin faina leh a pantu mipuite tha taka lo dawn sawn chu thil inhmeh tak ani tih a sawi.

Kum 2023-2024 leh kum 2024-2025 inkara Hriselna leh Thianghlimna kawnga hma la tha te lawmman Kayakalp Award semna a hmanpui na ah he thu hi sawiin Pi Lalrinpuii chuan Mizorama damdawiin te a thianghlim tawh tih sawiin damdawiin fai tura hma an lakna chu chhuanawm atih thu a sawi a, damlote ngaihsak leh damdawiin tihfai chu a inzawm tlat tih sawiin damdawiin faina ringawt ngaihtuah lo a Damlo ngaihsak a tul thu sawiin doctor te an awmna hmuna awm tam a pawimawh thu a sawi a, an awmna hmuna mipuiten an rin ngam leh inngahna ni thei tura tan lak a pawimawh thu a sawi.

Pi Lalrinpuii chuan ram pumah Faina chuan ngaih pawimawh a hlawh chhoh zel lain sawrkar damdawiin chu private damdawiin te nen tehkhin chuan a fai lo deuh thin a ti a, thawktute tan la zual tura chahin Kayakalp in a tum ber Faina kawnga hmasawn kawngah theihtawp chhuah a pawimawh thu a sawi bawh.

Vawiina hun hmanah hian faina kawnga Damdawiin ti tha hrang hrang te lawmman sem a ni bawh.



HLUKHLA KUT

Laifate Kut ngaihluat ber, Hlukkha chu Central YLA Playground, Lawngtlai ah vawiin atang khan hman tan a ni.

Hlukkha Nikhatna ah Kut thlengtu LADC a Executive Secretary Pu K.Lalthanzara chuan hlim taka kut hmang turin mipui a sawm a, Pi leh Pu hun a Hlukkha Kut hman thin dan tlangpui a sawi a ni.

Kut Pa, Lai Autonomous District Council a Chief Executive Member Pu V Zirsanga chuan ram mipuite Hlukhla kut chibai bukin duksakna a hlan a, hnam ziarang a bo loh nan Hlukhla Kut chawi nun zel chu LADC Sorkar pawhin a ngaih pawimawh hle a ti a, Laifate nun zemawi chu Kristianna nen inhne rem tak, hnam ziarang humhimna pawimawh tak a ni a ti a, Kut ropui taka hmanna chuan ram mipuite hmalam thlira, ram leh hnam hmasawnnan ke pen thar tirtu nise a duh thu a sawi bawk.

Hlukhla Kut ah hian rampum huapa zaithiam lar leh tualchhung zaithiamte an zai a, ram tana hnathawk tha te chawimawina hlan niin, hnam lam hrang hrang bak ah hnam infiamnate pawh neih tura ruahman a ni.



NATIONAL PARA JUDO CHAMPIONSHIP

National Para Judo Championship vawi 13-na neih mekah Mizoram tan, mitdel David Lalremruata chuan gold medal a hlawh chhuak.

West Serzawl tlangval David-a hi Mizoram aiawha he inelna tel hmasa ber a ni a, a vawi khat telnaah gold medal a la thei a ni.

Judo hmanga inelna hi February ni 24 leh ni 28 inkar khan Lucknow khawpuiah neih a ni a, David-a hi blind category, below 81kg (J1) category-ah inlanin, a khingpuite 'ippon' (knockout) hmangin a hneh vek a, David-a inlanna hi senior category niin, tun inelnaa player tel an tamna ber a ni a, mi pakua ngawt an inlan a ni.

West Serzawl tlangval hian final-a a hmachawn Nayak aiin bout khatin a khel tam zawk a, heti chung hian hnehna a chang tho a ni.

Ruahman dan chuan March 2, Pathianni hian Delhi atangin an lo haw dawn a, Mizoram Judo Association chuan an player chhuanvawr hi ropui taka lo hmuah an tum a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.

